

Kerweredd 2007

copy@ninopiazza

Lied: Die Hoambecher Kerb iss do!

Seid ehr all do?

Kenne meer oufonge?

Wos wor des for en Umzug, heit uff de Stroß,

in Hoamboach sinn die Rocker los,

mit diesem Motto, unbelese,

iss heit schunn wos lous gewese.

So grieße ich, de Kerweborsch Steffen und die Kerwekönischin Mara,

in hübscher Begleitung von Linda und Vanessa,

sowie de Tobias und der Alexander,

unsre Gäscht hier allmiteinander,

um zu feiern riesegrouß,

in Hoambach sinn die Rocker lous!

Zuersch emol en Donk gonz schnell,

on die Sunnerbecher Bloskapell,

die seit 30 Jahr, des iss de Hit,

beim Umzug leeft gonz vonne mit,

unn uns jedes Jahr uffs neue,

mit ehrne Blosmusik erfreue.

Ich werd jetzt berichte, wos letschd all passiert,

und des direkt unn unscheniert,

jawoll - meine Herrn und Damen,

ich nenn die Dinge heit beim Namen,

in Wort for Wort, und riesengrouß,

im Tal der Rosen iss immer wos lous!

Gebt meer vorher en Schoppe,
der leeft gut noi,
unser Kerwe, die iss foi!

Musikkapelle: Im Tale der Rosen

Des Owerdorffescht ein jeder kennt,
aach letschd Johr iss alles dorthie gerennt,
meer feiert dort schun zehn lange Jahre,
unn will jetzt for en Brunne spare!
Doch die Behörde, meer konns net glawe,
losse uns nett for den Brunne spare,
Zuerscht koscht die Ausschankgenehmischung,
dezu e deirie Scheewetterversicherung,
zum gute Schluß kam aach noch die GEMA,
unn wollt Gebührn, des was meer ja,
so wird in Deitschloand, meer iss es gewohnt,
Gemeinnützigkeit nicht belohnt.
Doch ehr Owwerdörfler, gäbt nett uff,
macht aach des Johr oaner druff,
donn kimmt aach bald, holt nett sou geschwind,
de Owwerdorfbrunne – gonz bestimmt!

Holzfällaktion Wasserschöpp

Musik: Ja im Wald da sind die Räuber

Wos e Uhruh, des iss koan Hohn,
wor letschd die groß Holzfällaktion,
die Wasserschöpp, wie meer se kennt,
wurd zum Mittelpunkt der Welt!

Die Zeitung tat es grouß berichte,
und Bürger wollte nett verzischde,
mit Leserbriefe gings hie unn her,
diskutiert unn noch veel meer!
Klar sieht des jetzt bläid aus, ehr liewe Leit,
doch dem Kinnergarde gibt's mäi Licht unn Sicherheit!

Moin Vorschloag wär, des wär doch schee,
gründet ein Wasserschöppkomitee,
unn macht donn uff em Kerweplatz beileiwe,
e Boamfesd, es wärd wos iwwrisch bleiwe!
Vom Erlös, des wär doch schön,
pflanzt er donn die neie Beem!

Doch do fällt meer ewe oi,
es kann noch veel wos onners soi,
die Beem sinn um, ich konns uffdecke,
weil meer häwwe sou veel Zecke,
die im Wold sou weit verbreit,
unn donn londe uff de Leit.
Koa Beem, koa Zeck, des iss doch foi,
do fällt aach koa ins Woiglos noi!
Die gäin kapputt im Alkohol,
guggt ins Glos, sehr zum Wohl
unnd for die Heddi iss es aach gut, uff jeden Fall,
freier Blick uff Schlossberghall!

Maibaum in Oberhambach

Lied: Der Mai ist gekommen, die Bäume schlagen aus

Der Winter wor windisch unn veel zu warm,
drunn gab es oft en Sturmalarm,
in Owwerhoamboach, dess iss nett geloche,
hotts den Maibaum dort getroffe,
denn hotts geschmesse, uff die Seit,
uff de Wiss, er heit noch leit,
alle Leit gugge jetzt dumm,
meer brauche e Versicherung,
bevor meer donn, des iss koan Bluff,
den Maibaum stelle wärrer uff!
Spätestens om fünfte Mai,
muß die Sach erledischd soi,
denn Kardinal Lehmann kimmt, meer sin frouh,
unn guggt sich des Kappelsche ou
um donn dennoch mit Parrer Röhr in vollem Glanze,
um den Maibaum muss donn donze!

Meer häwwe im Ort, jetzt ohne Frage,
e neii Kompostieranlage,
die schonend bis zum letschde Rest,
allen Grünschnitt uns zersetzt.
Es sei genannt hier ohne Frage,
es sinn dem Mitsche Bernd soi Gaase!
Die fresse sogar, ou wie schön,
de Feierwehr ehr Woinachtsbeem,

die die Jugend gonz salopp,
nooch Woihnoachte oigesammelt hott!
Ja ehr Leit, des wor gonz doll,
es wor voll e gonzi Roll!
Sou braucht meer jetzt, meer konns sou nenne,
die Woinoachtsbeem nett mäi verbrenne!
Sou löscht ich moin Dorscht, mit Hoambecher Woi,
denn nur dess kann rischdisch soi!

Lied: Feuerwehr

Es gibt in Hoamboach Owwerschlaue,
die häwwe wärklich Gottvertraue!
Sou kann ich berichte hier gonz stolz,
vun einer Familie Namens Wolf,
die häwwe die gonz Noacht, des sinn koa Bosse,
ehr Garage uffstäie losse,
unn woss wor do sou alles drinn,
do kimmt mehr veeles in de Sinn,
Werkzeig unn veel Käsche Bier, der Hit,
schrie förmlich alles, nemmt uns mit
wos zum Glick kein Mensch endeckte,
dass im Mercedes der Schlissel steckte,
doch nix wurd geklaut, sou behaupt ich heit,
in Hoamboach lewe ehrliche Leit,
doch on die Wolfs soag ich munter zu,
macht demnäscht eier Garasch zu,
meer was jo nie, sou gonz bestimmt,
ob mol oans fun auswärts kimmt.
Zum Wohl!

Lied: Narhallamarsch

Houch geschätzt, ein jeder lacht,
dass iss Hoambecher Fassenacht,
die sinn gut, des waas meer a,
unsere Aktive der HABAFa!
doch diesjohr iss mol wos bassiert,
de Lerchels-Willi unscheniert,
ein jeder do hier ihn aach kennt,
ja unsern Sitzungspräsident,
wor pletzlich medde in de Sitzung – sou konns gäi,
uff oamol fort unn nett meer zu säi.
Noach Rucki-Zucki, Auf und nieder,
kam er noch ner halb Stund wieder!
Schoints hott er nett vertroache, der Allmoi,
vun de Krick unsern gute Woi,
unn musste, ja sou konn meers nenne,
uff de ABEE gonz schnell renne!
Ja, des wor e Riesenschau,
uff de Willi ein Tusch und Helau!

Musik: Tusch

Braucht meer for die Hoarn en neie Schnitt,
gäit moncher vun Hoamboch gern zum Frieser Schmitt,
der in Hepprumm hott schun lange Jahre,
in de Jakob-Maier-Stroß hott so in Lade!
Die Fraa Meon fum Owwerdorf hatte Kummer,
und suchte verzweifelt fum Schmitt die Telefonnummer,
um sich dort, dess sin koa Bosse,
die Hoarn mol wärrer schneide losse.
Sie hott gewählt, donn eine Nummer,
die se im Telefonbuch unner „Schmitt“ gefunne.
Es nahm tatsächlich jemand ab,
un Fraa Meon frogte obs heit noch klappt
um wieveel Uhr se kumme kennt.
Die onner Stimm om onnern End,
sprach sodann gonz vehement,
du konnscht gern kumme, doch beileibe,
du ich uff koan Fall doi Hoarn hier schneide,
hier iss vun Hoamboch Schmitt, veel Gries,
fum Alfons und de Annelies!
Dodruff en Schoppe, noi in die Kehle,
ich muss als schun moi Gorgel ehle!

Zum Schluß denk ich noch, es muß sou soi,
on unsern liewe Hannes Rhoi,
der guggt uns jetzt sicher fun owwe zu,
jetzt hott er soi verdienti Ruh,
du hoschd seehr veel for uns gemacht,
on Kerwe unn on Fassenacht!

Sou ehr Leit, gonz unbelese,
des wor die Kerweredd gewese,
feiert noch schee im Rousetal,
hääbt eiern Spass uff jeden Fall!
Unn sollt ich monches mies gemacht,
Humor iss, wenn man trotzdem lacht!
Dodruff en Woi, fraat eich heit,
ein Prosit der Gemütlichkeit!
Ich hoff, es dutt sich koans beschwere,
dass wors, es war mir eine Ehre!

Kappelle: Ein Prosit der Gemütlichkeit